



INSTRUKCIJA
o žrijebanju u Centralnoj izbornoj komisiji Bosne i Hercegovine

Sarajevo, januar 2009. godine

Na osnovu člana 2.9 stav (1) tačka 2., a u vezi člana 9.5, 9.8, i 13.5 Izbornog zakona Bosne i Hercegovine («Službeni glasnik BiH», br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08 i 37/08), Centralna izborna komisija Bosne i Hercegovine je na 1. sjednici održanoj 13.01.2009. godine d o n i j e l a

INSTRUKCIJU o žrijebanju u Centralnoj izbornoj komisiji Bosne i Hercegovine

Član 1. (Primjena)

Ovom Instrukcijom utvrđuje se postupak žrijebanja (u daljem tekstu: žrijebanje) u Centralnoj izbornoj komisiji Bosne i Hercegovine (u daljem tekstu: Centralna izborna komisija BiH).

Član 2. (Žrijebanje)

Žrijebanje se provodi ako je prilikom raspodjele mandata rezultat isti zbog identičnih količnika, kao i kod popune predstavničkih tjela gdje je obavezna raspodjela mandata iz konstitutivnih naroda i iz reda ostalih.

Član 3. (Mjesto žrijebanja)

- (1) Žrijebanje se provodi u prostorijama Centralne izborne komisije BiH.
- (2) Centralna izborna komisija BiH po utvrđenom datumu žrijebanja, obavještava političke subjekte koji učestvuju u postupku žrijebanja o vremenu i mjestu gdje će se održati žrijebanje.
- (3) Obavještavanje o žrijebanju vrši se putem telefona ili faks aparata ili poštom.

Član 4. (Lica)

Žrijebanje se provodi od strane državnih službenika iz Sekretarijata Centralne izborne komisije BiH, koje odredi Centralna izborna komisija BiH.

Član 5. (Javnost žrijebanja)

- (1) Žrijebanje je javno i istom mogu prisustvovati sva zainteresirana lica.
- (2) O vremenu i mjestu žrijebanja, Centralna izborna komisija BiH javnost obavještava saopštenjem za javnost i putem svoje web stranice www.izbori.ba.

Član 6.
(Postupak žrijebanja)

(1) Žrijebanje se provodi na sljedeći način:

- a) listići sa imenima političkog subjekta odnosno kandidata sa identičnim količnikom, ubacuju se u identične neprozirne kuglice koje se potom stavljaju u providnu posudu za žrijebanje, i nakon toga pristupa se njihovom izvlačenju;
- b) lice koje je odredila Centralna izborna komisija BiH prvo će rukom izmješati sve plastične kuglice, a potom će izvući jednu plastičnu kuglicu sa imenom političkog subjekta odnosno kandidata sa identičnim količnikom i naglas saopštiti ime političkog subjekta odnosno kandidata koji je izvučen. Na taj način će se utvrditi koji politički subjekt odnosno kandidat sa identičnim količnikom je osvojio mandat;
- c) podaci o imenu političkog subjekta odnosno kandidata koji je dobio mandat oglašavaju se na tabli u prostoriji gdje se vrši žrijebanje;
- d) postupku dodjele mandata iz tačke a) ovog člana identičan je i postupak u slučaju žrijebanja za oduzimanje mandata, ako je za tu procesnu radnju potrebno izvršiti žrijebanje.

Član 7.
(Zapisnik)

O provedenom žrijebanju sastavlja se zapisnik u skladu sa odredbama Zakona o upravnom postupku («Službeni glasnik BiH», br. 29/02, 12/04 i 88/07).

Član 8.
(Audio i video snimanje)

- (1) Tok žrijebanja može se snimati audio i video tehnikom, što će se evidentirati u zapisniku o provedenom žrijebanju.
- (2) U zapisnik se unosi ko je i u čije ime vršio audio i video snimanje i mjesto gdje će se nalaziti snimci sa tog snimanja.
- (3) Ako Centralna izborna komisija BiH naredi da se vrši audio i video snimanje žrijebanja, audio i video dokumentacija o provedenom žrijebanju čuvat će se u Centralnoj izbornoj komisiji BiH zajedno sa zapisnikom o provedenom žrijebanju.

Član 9.
(Prigovor)


- (1) U toku postupka žrijebanja, kao i po provedenom žrijebanju nezadovoljna strana može izjaviti prigovor Centralnoj izbornoj komisiji BiH.
- (2) Izjavljeni prigovor službena osoba unosi u zapisnik.
- (3) O izjavljenom prigovoru odluku donosi Centralna izborna komisija BiH.

Član 10.
(Objava u službenim glasilima)

Ova Instrukcija stupa na snagu danom donošenja i objavit će se u «Službenom glasniku BiH», «Službenim novinama F BiH», «Službenom glasniku RS», «Službenom glasniku Brčko Distrikta BiH» i web stranici Centralne izborne komisije BiH www.izbori.ba.

Broj:05-1-02-2-158/09
Sarajevo, 13.01.2009. godine

Predsjednik
Dr. Suad Arhaučević



3